

現代生活藝術系列

# 華嚴經疏論纂要

56

——十迴向品之十

華藏淨宗學會印贈

大方廣佛華嚴經疏論纂要卷第五十六

五臺山清涼國師澄觀疏鈔

太原方山長者李通玄論

閩鼓山私淑比丘道需纂要

十迴向品第二十五之十

○第八真如相迴向。長行中二。先廣明。後結示。前中亦二。先明位行。後辨位果。前中亦三。今初標名。

佛子。何者是菩薩摩訶薩真如相迴向。

〔疏〕善根合如。以成迴向。從所依立名。義通能所故。

本業云。常照有無二諦。一切法一合相故。鈔從所依立名  
者。但言真如相。即是所依善根。合如故。義通能所。  
常照者。以有能所。况一合相。復有二義。一有無不  
二。即一合相。以同如故。二智與境  
冥。絕能所故。即通能所。為如相矣。

論第八真如相。迴向。以願波羅密為體。明此位同  
第八地智增勝。以願引生智業。成大悲故。以願防  
智。為智體淨故。利化不弘。表法中。如善財童子見  
東方正趣菩薩。是其行也。從空中來。至娑婆世界  
者。明法空智現。普周亦無來去。觀世音指東方正  
趣。及見時。與觀世音同會而見。表以願會悲。至智  
明圓。悲令滿故。東方表智。西方表悲。日出照明。春

陽發生。青龍吉祥。表智日入昏迷。秋霜白虎殺害。明智入悲。處苦流濟衆生故。第八願波羅密。明防智體性淨。以願會悲。成普賢行。昇進隨其行位。和會如之。

○第二依徵廣釋中三。初明隨相迴向。二佛子菩薩摩訶薩以此善根下。離相迴向。三佛子此菩薩摩訶薩如是迴向時得一切下。迴向成益初。中分二。先積善迴向。後佛子菩薩摩訶薩若見下。觸境迴向前中亦二。先明所迴行體。後菩薩爾時慧眼下。攝將迴向前中亦二。先積集資糧。

後結德成就今初。

佛子。此菩薩摩訶薩。正念明了。其心堅住。遠離迷惑。專意修行。深心不動。成不壞業。趣一切智。終不退轉。志求大乘。勇猛無畏。植諸德本。普安世間。生勝善根。修白淨法。大悲增長。心寶成就。常念諸佛。護持正法。於菩薩道。信樂堅固。

〔疏〕文有十句。初一爲總。謂正念堅明。下九爲別。文有三節。初二正念菩提。一遠離迷惑。是明了義。專意修行。卽爲正念。正念是定。明了是慧。定慧雙運。爲道之源。二契理不動。故曰淡心。緣不能沮。成不

壞業。卽自分堅任。二求佛不退。卽勝進堅任。次四句。正念化生。初句爲總。勇求兼濟爲大法故。下三句別。一悲智雙運爲明了。般若爲衆德之本故。二進善去漏爲正念。三悲增智圓爲堅任。後三正念三寶。一念佛。二護法。三信僧。上有正念。下句堅固。影畧該攝。

○二結德成就

成就無量淨妙善根。勤修一切功德智慧。爲調御師。生衆善法。以智方便而爲迴向。

〔疏〕文有四句。前三結前。一非止上十。故云無量。二

三統而收之不出福智大悲末句生後廻向

○第二攝將廻向中二先觀察善根本期廻向二

正明廻向今初

菩薩爾時慧眼普觀所有善根無量無邊其諸善根  
修習之時若求緣若辦具若治淨若趣入若專勵若  
起行若明達若精審若開示如是一切有種種門種  
種境種種相種種事種種分種種行種種名字種種  
分別種種出生種種修習其中所有一切善根悉是  
趣向十力乘心之所建立皆悉廻向一切種智唯一  
無二

疏文有二。初總標次其諸善下。別顯三。如是下。總結於中。二先結種類多門。有十句。謂隨前求緣等。有多差別。一通游非一故。如一趣入爲用。有門爲用。空門乃至無量。故慈行童女云。諸佛各以異門。令我入此。普莊嚴門。二隨其一門。緣何爲境。爲佛爲法等。三隨一境上。相貌不同。四相所依事。謂色心等。五隨一事上。有多分位。六施等萬行。七能詮名字。八分別決擇。九生多知見。十若定若慧。上中下修。後其中下。結修本意。本意旣然。寧不廻向。

○第二正明廻向分二。初向菩提。二佛子菩薩摩



訶薩如爲己身下。迴向衆生今初

以諸善根如是迴向。所謂願得圓滿無礙身業修菩薩行。願得清淨無礙口業修菩薩行。願得成就無礙意業安住大乘。願得圓滿無障礙心淨修一切諸菩薩行。願起無量廣大施心周給無邊一切衆生。願於諸法心得自在。演大法明無能障蔽。願得明達一切智處發菩提心普照世間。願常正念三世諸佛諦想如來常現在前。願住圓滿增上志樂遠離一切諸魔怨敵。願得安住佛十力智。普攝衆生無有休息。

〔疏〕前中有二十願分三初十願願成智行。卽菩提

# 因果

願得三昧遊諸世界。而於世間無所染著。願住諸世界。無有疲厭。教化衆生。恒不休息。願起無量思慧。方便成就菩薩。不思議道。願得諸方不迷惑智。悉能分別一切世間。

〔疏〕二四願周徧利生。卽化用因果。一化所依。二化時處。三知藥治。四識病宜。

願得自在神通智力。於一念中悉能嚴淨一切國土。願得普入諸法自性。見一切世間悉皆清淨。願得生起無差別智。於一剎中入一切剎。願以一切剎莊嚴。

之事。顯示一切教化無量無邊衆生。願於一佛刹中  
示無邊法界。一切佛刹悉亦如是。願得自在大神通  
智。普能往詣一切佛土。

〔疏〕三六願普嚴佛刹。卽淨土因果。一神通智嚴淨  
事土。二入理智嚴法性土。亦非嚴嚴故。三事理無  
礙智嚴帝網土。四以前三嚴用化衆生。上四因圓。  
後二果滿。

○第二廻向衆生

佛子。菩薩摩訶薩。以諸善根。願得莊嚴一切佛國。願  
得周徧一切世界。願得成就智慧觀察。如爲己身如

是迴向。如是而爲一切衆生。所謂願一切衆生永離一切地獄畜生閻羅王趣。願一切衆生除滅一切障礙之業。願一切衆生得周普心平等智慧。願一切衆生於怨於親等心攝受。皆令安樂智慧清淨。願一切衆生智慧圓滿淨光普照。願一切衆生思慧成滿。了真實義。願一切衆生以淨志樂趣求菩提。獲無量智。願一切衆生普能顯示安隱住處。佛子。菩薩摩訶薩恒以善心如是迴向。爲令一切衆生遇清涼雲。霑法雨。故爲令一切衆生常值福田勝境界。故爲令一切衆生皆能善入菩提心藏。自護持。故爲令一切衆生

離諸蓋纏善安住故爲令一切衆生皆獲無礙神通  
智故爲令一切衆生得自在身普示現故爲令一切  
衆生成就最勝一切種智普興利益無空過故爲令  
一切衆生普攝羣品令清淨故爲令一切衆生皆能  
究竟一切智故爲令一切衆生心不動搖無障礙故。

〔疏〕文三。初牒前起後。卽從後倒牒前之三段。一所  
謂下。正顯廻向。文有八句。初二願離三障。障礙之  
言義兼煩惱。次四成四智。後二結二果。謂菩提涅  
槃。菩提不唯四智。故云無量。三佛子下。總結所爲。

○第二觸境廻向

佛子。菩薩摩訶薩。見可愛樂國土園林。草木華果。各香上服。珍寶財物。諸莊嚴具。或見可樂村邑聚落。或見帝王威德自在。或見住處離諸誼雜。見是事已。以方便智。精勤修習。出生無量勝妙功德。爲諸衆生。勤求善法。心無放逸。廣集衆善。猶如大海。以無盡善。普覆一切。爲衆善法所依之處。以諸善根。方便迴向。而無分別。開示無量種種善根。智常觀察一切衆生。心恒憶念善根境界。以等真如平等善根。迴向衆生。無有休息。

〔疏〕大同淨行對境發願於中五。一列所見境。二見

是事下。覩境成德。謂增悲智。二以諸善根下。總明  
迴向。亦是迴向之德。四菩薩爾時下。別明迴向。五  
佛子下。迴向成益。前三如上可知。

菩薩爾時以諸善根如是迴向。所謂願一切衆生得  
諸如來可愛樂見。見法真性平等平等。無所取著。圓  
滿清淨。願一切衆生見諸如來甚可愛樂。圓滿供養。  
願一切衆生往生一切無諸煩惱甚可愛樂。清淨佛  
刹。願一切衆生得見諸佛可愛樂法。願一切衆生常  
樂護持一切菩薩可愛樂行。願一切衆生得善知識  
可愛樂眼見無所礙。願一切衆生常見一切可愛樂。

物無有違逆。願一切衆生證得一切可愛樂法而勤護持。願一切衆生於一切佛可樂法中得淨光明。願一切衆生修諸菩薩一切能捨可愛樂心。○願一切衆生得無所畏。能說一切可愛樂法。願一切衆生得諸菩薩極可愛樂甚深三昧。願一切衆生得諸菩薩甚可愛樂陀羅尼門。○願一切衆生得諸菩薩甚可愛樂善觀察智。○願一切衆生能現菩薩甚可愛樂自在神通。願一切衆生能於諸佛大衆會中說可愛樂甚深妙法。願一切衆生能以方便開示演說甚可愛樂差別之句。○願一切衆生常能發起甚可愛樂



平等大悲。願一切衆生念念發起甚可愛樂大菩提心。常令諸根歡喜悅豫。願一切衆生能入一切甚可愛樂諸如來家。願一切衆生得可愛樂能調伏。行調伏衆生無有休息。願一切衆生得諸菩薩甚可愛樂無盡辯才演說諸法。願一切衆生於不可說不可說劫住於一切可樂世界。教化衆生心無厭倦。願一切衆生以無量方便。普能悟入甚可愛樂諸佛法門。願一切衆生得可愛樂無礙方便。知一切法無有根本。願一切衆生得可愛樂離貪欲際。知一切法畢竟無二斷一切障。願一切衆生得可愛樂離貪欲際。知一

切法平等眞實。願一切衆生具足成滿一切菩薩甚  
可愛樂無戲論法願一切衆生得金剛藏精進之心。  
成可愛樂一切智道願一切衆生具可愛樂無礙善  
根摧伏一切煩惱怨敵願一切衆生得可愛樂一切  
智門普於世間現成正覺

〔疏〕四別明迴向中。初句總標。標將說別。上起行中  
云。以諸善根。方便迴向。未知迴向。其相云何。故云  
爾時如是迴向。○後所謂下。別顯。顯如是言。三十  
一願。皆言令得可愛樂者。由見可愛樂境。起可愛  
樂善。故願成可愛樂德。釋此諸願。橫對上境。發等

流願言橫對者。初之十願對上國土。一若見國土。當願衆生見法性土。二土之供具。三通受用變化。淨土餘皆土中之事。可以意得。對此一境發十願者。以一例諸。皆應有多。不欲繁文。下漸從畧。鉢餘土中之事者。四法卽法門流布。五行卽菩薩修行。六卽天眼常喜。世界生者。天眼微見十方。七則水鳥樹林。花池寶閣。八護法。九證法。十心無著。○次得無畏。下三願對上園林。無漏法林。無所畏故。總持三昧爲園苑故。無漏法林等。卽淨名佛道品。無漏法林樹。總持之園苑。下經三昧爲園苑故。○次一願對上草木。善觀五乘。三草二木智差別故。對上草木。木卽法華藥草喻品。初會已引。五乘差別。但由智異。故將善觀察智以對草木。○次三對

華神通等法。如華開敷。處衆開演。皆華敷。故果之  
一種。留在後明。○從發大悲下。一願以對一境。謂  
大悲熏心。以對上香。令根喜悅。如彼上服。生如來  
家。得珍寶分。以調伏。行爲聖財物。無礙辨說。爲莊  
嚴具。可樂世界。猶如於村。悟入多門。等彼城邑。無  
礙無本。如彼聚落。畢竟無二。若國無二。王證離欲  
際。方得自在。無戲論法。爲離誼雜。後三句。卽對前  
果。

佛子。若菩薩摩訶薩。修習如是諸善根時。得智慧明。爲  
善知識之所攝受。如來慧日。明照其心。永滅癡冥。勤

修正法。入諸智業。善學智地。流布善根。充滿法界。以智迴向。盡諸菩薩善根源底。以智深入。大方便海。成就無量廣大善根。

〔疏〕第五迴向成益中。先明得時。後得智下。正顯十句攝爲五對。一以因感緣。由智內明。外爲友攝。二以緣感因。外蒙慧照。內滅癡冥。此除障益。三由勤修。入三慧業。此明學益。四上學證智。自善替充。此證入益。五盡善福源。入實智海。此成二嚴益。卽爲向實際之本。以智窮人故。

○第二離相迴向。卽向實際。此與前諸迴向小異。

前多攝相歸性。少有依性起相。今此多顯性相。無礙以爲如相。故上諸標文皆躡前隨相之時。今不要對前以成無礙。故無時字。文分爲二。初。直明迴向。後譬如下。對如廣辨。今初分二。初。順如之行。二。順如之益。今初。

佛子。菩薩摩訶薩。以此善根如是迴向。所謂不著世間。不取衆生。其心清淨。無所依止。正念諸法。離分別見。不捨一切佛。自在慧。不違三世一切諸佛。正迴向門。隨順一切平等正法。不壞如來真實之相。等觀三世無衆生相。善順佛道。善說於法。深了其義。入最勝。

地悟真實法。智慧圓滿信樂堅固。雖善修正業而知業性空。了一切法皆如幻化。知一切法無有自性。觀一切義及種種行。隨世言說而無所著。除滅一切執著因緣。知如實理。觀諸法性皆悉寂滅。了一切法同一實相。知諸法相不相違背。與諸菩薩而共同止修。行其道善攝衆生。入去來今一切菩薩迴向之門。

〔疏〕文二。先約心。則止觀雙運。不著有無。後別約行。則權實雙行。不違性相。今初復二。一止寂妄取。不違體用。二等觀下。觀達空有信智雙圓。前中初二句標。次其心下二句釋。上句無所取。故下句

離能取故。不捨下。明其不違。一不違因。二不違法。三不違果。所以不違者。不著無故。觀中。初觀真空。善順下。觀其妙有。二雖善下。權實雙行中。初句立宗。以無礙爲宗。次句同喻。如幻相有。體卽虛故。後知一切下合。及出所因。一法無性故。二觀一切下。觀無著故。上二順於空如。三知如實下。知一實故。則順不空如。四知諸法下。結成無違。五與諸下。結成所作。謂能橫入一道。豎入一門。（鈔）初句立宗者。卽雖善修正業。而知業性空。量云正業是有法。空有無礙是宗法。因云緣成。卽無性故。同喻云如幻。幻法從緣生。空有不相礙。正業從緣生。同彼幻法不相礙。



○二順如益

於諸佛法心無驚怖。以無量心令諸衆生普得清淨。  
於十方世界不起執取我我所心。於諸世間無所分  
別。於一切境界不生染著。勤修一切出世間法。於諸  
世間無取無依。於深妙道正見牢固。離諸妄見。了真  
實法。

〔疏〕益中十句五對。今四心彌固。一上安深法下淨  
衆生。卽廣大心。二我不生。世見斯絕。卽不顛倒  
心。三於境無染。出世勤修。四不依世間。正道唯固。  
上二卽第一心。無住涅槃爲第一故。五妄見斯寂。

了實體同。卽平常心。常不捨離。同體悲故。鈔十句五對者。卽天  
親般。若論中答。住問也。若依無著。卽當第一發心。  
任處。然無著十八住處。住住皆答三問。三問卽應。  
云何住。應云何修行。應云何降伏。秦經闕修行問。  
合在二中。言發心住處者。經佛告須菩提。菩薩應  
如是降伏其心。所有一切衆生之類。若卵生。若胎  
生。若溼生。若化生。若有色。若無色。若有想。若無想。  
若非有想。非無想。卽廣大心。我皆令入無餘涅槃。  
而滅度之。第一心也。如是滅度無量無數無邊衆  
生。實無衆生得滅度者。常心也。何以故。須菩提。若  
菩薩有我相。人相。衆生相。壽者相。卽非菩薩。不顯  
倒心也。論偈云。廣大第一常。其心不顛倒。利益深  
心住。此乘功德滿。此偈上半標四心。下半說住義。  
四心利益具。自他行故。此淡心菩薩。應任大乘功  
德。盡圓滿矣。四心者。三界九類皆盡度之。是廣大  
心。令入無餘涅槃。是第一心。二乘尚有二餘。非曰  
無餘。不名第一。今二種涅槃。無餘第一。四涅槃中。  
無住涅槃。方爲第一。今言無餘。卽佛無住。往昔但  
有三涅槃。故不言無餘耳。彼疏科上二心。名加行。

住言常心者論云如是取衆生如我身常不捨離是名常心偈中利益解其常義謂度衆生常不離大悲同體如我之心故名常矣疏科此心爲修行定言不顛倒心者疏科爲折散心言不顛倒者論云此示現離依止身見衆生等相故依身執我名爲身見有我等四卽非菩薩是名顛倒今離此四卽是菩薩非顛倒心大雲言此文卽根本智前文大悲是後得智由根本智離我見故前大智悲觀無衆生相始得成就又大雲解實無衆生得滅度者總有五義一衆生性空故無可滅二菩薩後得智同體大悲離自身外無別衆生卽無他體於根本智必先自離我見之相卽自無體既無自他實無衆生得滅度矣三一切衆生本來寂滅不更滅故四願法性法性無念心若起念卽違法性故五解法界不度衆生天親解云平等眞法界佛不度衆生以衆生名名卽法界衆生陰身陰卽法界衆生與佛同一法界豈於此理度衆生哉故淨名云衆聖賢亦如也至於彌勒亦如也若彌勒得授記者一切衆生亦應授記以同一如不應別故斯理特深天親下文有此解者謂教地上諸大菩薩以

初地上盡證真如。令地上學佛平等法界觀矣。而  
今天親卽解此文。大悲同體是教地前。學地上觀  
故爲此釋。天親妙意。今日曉矣。釋曰。上皆暉公之  
意。今謂不然。且問寂滅與空爲一。爲異。若言一者。  
則初三不別。若言異者。異相云何。豈不詮言法性  
本空寂耶。又寂滅言。但是盡相。爲顯實耶。若是顯  
實。卽同第五同一法界。又同體悲寧。殊同一法界。  
又五法界與順法性。復何差別。非無念智。不名眞  
解。是知論明法界。生佛相望。論明同體。菩薩望生  
故不應二。則上五解。唯應爲二。其無念義。應合在  
於不顛倒心。經唯舉我爲顛倒法。執不亡。豈非顛  
倒。故不顛倒。約止絕妄想。同體常心。觀冥眞理。是  
故經文。以不顛倒釋。上常心云。何以故。由無妄故。  
方能契實。由契理故。方得無妄。二義相成。故無衆  
生得滅度者。一契空如。性空寂滅。故無可度。二契  
不空同。一法性。法性平等。故無可度。足顯玄妙。皆  
就諸佛菩薩觀心。非獨約理。故今疏文。直取論意。  
便爲正解。復順今經。以今經證天親解經。妙符聖  
旨。

○第二對如廣辨如相迴向。生此段文。畧以五門分別。一釋名。真謂真實。顯非虛妄。如謂如常。表無變易。此法相宗。若法性宗云。不變為真。順緣曰如。由不變故。與有為法。有非一義。由順緣故。與有為法。有非異義。而起信云。無遣曰真。無立曰如。唯就遮詮。頓彰真理。鈔順緣曰如者。即隨緣義。淨名云。法隨於如。無所隨故。今謂如隨於法。無能隨故。以如性空。方能隨緣成。一切故。而起信下。此論解釋分中。初釋真如門。正舉法體有二。一正顯如體。二會執釋名。初門論云。心真如者。即是一法界大總相。法門體。所謂心性不生不滅。一切諸法。唯依妄念。而有差別。若離心念。則無一切境界之相。是故一切法。從本以來。離言說相。離名字相。離心緣相。畢竟平等。無有變異。不可破壞。唯是

一心。故名真如。釋曰。此上論文。自有三段。一。就實畧標。二。一切諸法下。會妄顯真。三。是故下。結真離妄。此三皆是正顯如體。卽離妄爲真。二。離異相爲如。今疏所引。卽會執釋名具足。二。明種類。或唯一味。無有差別。或分爲二。卽生空真如。法空真如。又安立非安立二。又空不空二。竝如常釋。或分爲三。約三性辨。如瑜伽等。或分爲七。謂一流轉真如。卽諸行流轉實性。二。實相真如。謂思惟諸法無二我性。三。唯識真如。卽唯識性。四。安立五邪行。六。清淨。七。正行。上四。卽如次四諦體性。如顯揚說。或分爲十。十地當明。或有百門。十。十無盡。如今經辨。則上來所列。皆是

其中一義。設言通一切法。亦一義耳。二明種類。總有六門。  
謂一。一。二。三。七。十。二辨德用。一。成依持用。與一切  
及百。為六類。三。辨德用。一。成依持用。與一切  
法而為所依。此能持故。二。成觀境。謂為賢聖證  
觀境故。亦是百門之一德耳。起信說有三大。一  
者體大。謂真如平等不增減故。二。相大。謂具足  
無量性功德故。三。用大。能成一切世間出世間  
善因果故。然彼依心說於三大。真如乃是其一。  
以一統二。二皆屬如。然違真名惡。契如則滅順。  
真為善。稱如則大。約善順義。故說如為善因。然  
違順雖殊。離如則無可違。故惡亦以如為體。若

會此經百門之內。或體。或相。或用。或兼。實則一  
 一皆通體等。故為百門。融通理事。使重重無盡。  
 猶如帝網。然彼依心下。對會今經。亦是解妨。妨  
 乃是其一。何得真如具三大耶。故彼立義。分中  
 云。摩訶衍者。總說有二種。一者法。二者義。所言  
 法者。謂眾生心。是心則攝一切世間出世間法。  
 依於此心。顯示摩訶衍義。所言義者。則有三種。  
 一者體。大等通局。既異。何得引耶。故下通云。以  
 一統二。二皆屬如。故下解釋分中。分為二門。真  
 如。即是一法界大總相。法門體。又此二門。不相  
 離。故如必有相用。二也。然違真下。三釋用大  
 義。似太局。亦名解妨。妨云。真如既為一切法體。  
 隨流成法。何得不言能生惡因果耶。故為此通。  
 是以瓔珞經云。始起一思想住於緣。順第一義諦。  
 名之為善。背第一義諦。名之為惡。約違義邊。不  
 言生惡於中。先明不言生惡。所以然違順。雖殊  
 下。釋為惡體。藏和向云。以違真故。不得離真。以



達真故。非其用也。故今疏云。離如則無可違。故不離也。如波違水。離水無波。若會此經下。第四會釋經文具。四約教不同。可以思準。四約教不關。至下當知。但有生空。始教即立二空。及六七等。不即於事。終教則即事即如。頓教多用非安立義。圓教即是百門。重五釋文者。然此百門。古釋非一。今且重無盡。十十科之。以配十地。十如初徧一切。及無相爲相等。即徧滿真如之義。謂此真如。二空所顯。無釋云。謂此法界徧一切行。以無少法非無我故。今言二空。無有一法非二空故。二中無能測量。無有比對。即最勝義。二中等者。唯識釋真如。具無邊德。於一切法最爲勝故。注云。由能離犯戒垢。證此真如德莊嚴故。今無測無對。即最勝。三。中於法無礙。爲衆法眼。即勝流義。二。中論

釋勝流真如云。謂此真如所流教法。於餘教法最爲勝故。注由得三慧。照大乘法觀此法教根本真如。名勝流真如。或證此如說法勝故。今云於法無礙。卽教法等爲衆法眼。亦勝流矣。四  
中無著無住等。卽無攝受義。四中等者論云。四真如。無所繫屬。非我執等所依取故。世親解云。於此如中。無計我所無攝我所。如北洲人無繫屬故。應說此如非我執我慢我愛無明邊見。我所見等所依取故。今無著無住。卽無攝受。五  
中罪竟無盡。無有變易。卽類無別義。五中下論別真如。謂此真如類無差別。非如眼等類有異故。注謂生灰涅槃。二皆平等。故無差別。今竟無盡變。豈有別耶。六中無有分別體性無生。卽無染淨義。六中下論云。六無染淨真如。謂此真如本性無染。亦不可說後方淨故。中邊釋云。由六地觀十二因緣。知緣起法。無染無淨。非謂如也。由真如故。法無染淨。名此真如爲無染淨。今無分別。何

有染。七中無所不在。住有無法。卽法無別義。七  
 下。論云。七法無別真如。謂此真如。雖多教法。種  
 種安立。而無異故。注。雖諸教法。依如建立。如無  
 異故。今無所不在。何有別。八中體性清淨。體性  
 耶。有無同如。法豈別耶。八中論云。八不增減。真如  
 平等。卽不增減義。謂此真如。離增減。執不隨染  
 淨。有增減故。卽此亦名相土。自在所依。真如。謂  
 若證得此真如。已現相。現土。俱自在故。注。謂凡  
 位不減。聖位不增。故。今九中徧一切法。是佛境  
 清淨平等。豈有增減。九中論云。九智自在。真如。謂  
 界。卽智自在義。若證得此真如。已於無礙解。得  
 自在故。注。謂此地中。得無礙解。名智自在。十中  
 今徧一切。智何不知。是佛境界。真自在也。十中  
 住一切地。成就一切諸佛菩薩等。卽業自在義。  
 其中餘義。可以類取。十中論云。十業自在。真  
 如。謂若證得此真如。已證

於一切神通作業。總持定門。皆自在故。今住一  
 切地成佛。菩薩業自在矣。然此十如。約詮辨體。  
 若不爾者。且如非先不徧。今者方徧。若不約詮。  
 說徧何法。上來畧取文中各有二義。以成其名。  
 餘各八義。取類。隨地別顯。唯說十如一具一切。  
 本名。可以意得。

十十成百。欲顯如德無量無邊。地前通修。等覺  
 徧等。如來窮證。地前通修者。第二通前後無如  
 妨。妨云。將百門如。配十地如。地  
 前等妙。應無如矣。故為通云。地前通修。十如等  
 覺。徧等十如。妙覺窮證。十如但同地如。無不同  
 矣。然異從義別。體本常融。但契一如。自含眾德。

非由作意。順差別如。能同廻向。亦融攝無礙。然  
 從下。第三通如。觀難成。妨云。十地菩薩。一地  
 之內。唯觀一如。加行既成。方證其一。今羅百數  
 成觀何由。况一味之如。何由契合。故今答云。約  
 行布說。別證十如。就圓融修。一含眾妙。加行有

異說十不同。正證相應。本唯一味。隨門入理。畧有百門。若契一門。自含衆妙。如海一滴。味具百川。牽衣一角。全體來矣。故唯識云。雖真如性。體無差別。而隨勝德。假立十種。十既假立。百門亦然。德用多門。非體不一。言能同迴向者。由如融攝。行順於如。亦融攝矣。故初地中。徧達十如。隨能證行。後稱如起行。體卽是如。但人信如德。尙後建立。迷迴向。故以如德。豁迴向德。若取文義便者。應云。真如體相徧一切處。善根迴向。以同如故。亦徧一切無邊際等。又徧一切。方得同如。稱如起四通迴向。非如妨。妨云。夫如普徧。無法非如。何有如外。別有迴向。以爲所驗。通意有二。一以其所信。驗所不信。二若取文。百門之內。各有二句。義下。立爲體式。則無前難。上卽所同之如德。下善根下。能同迴向之德。

譬如真如。徧一切處。無有邊際。善根迴向。亦復如是。徧一切處。無有邊際。譬如真如。眞實爲性。善根迴向。亦復如是。了一切法。眞實爲性。譬如真如。恒守本性。無有改變。善根迴向。亦復如是。守其本性。始終不改。譬如真如。以一切法。無性爲性。善根迴向。亦復如是。了一切法。無性爲性。譬如真如。無相爲相。善根迴向。亦復如是。了一切法。無相爲相。譬如真如。若有得者。終無退轉。善根迴向。亦復如是。若有得者。於諸佛法。永不退轉。譬如真如。一切諸佛之所行處。善根迴向。亦復如是。一切如來所行之處。譬如真如。離境界相。

而爲境界。善根迴向亦復如是。離境界相而爲三世一切諸佛圓滿境界。譬如真如能有安立。善根迴向亦復如是。悉能安立一切衆生。譬如真如性常隨順。善根迴向亦復如是。盡未來劫隨順不斷。

〔疏〕最初十中。初門顯在緣中。故無不徧。二明不變。故云真實。三明隨緣卽不變。云恆守本性。四示其性。五示其相。此五一向就如以辨。次二對智以說。故爲智境。八顯真如。非境爲境。謂要忘境方契如境。故如之本性。非安立故。九卽安立如。十卽如常之義。餘可思準。逐難當解。

譬如真如。無能測量。善根迴向亦復如是。等虛空界。盡衆生心。無能測量。譬如真如。充滿一切。善根迴向亦復如是。一剎那中。普周法界。

〔疏〕十二云。充滿一切者。謂若色若心。若大若小等。極微剎那。亦皆圓滿。非分滿故。如不可分。分則多過。卽由此義。及下四十。不離諸法。故諸法隨如徧一塵中。故下果中。得此門故。一毛容納一切剎等。譬如真如。常住無盡。善根迴向亦復如是。究竟無盡。譬如真如。無有比對。善根迴向亦復如是。普能圓滿一切佛法。無有比對。



〔疏〕十四無比對者。法性不並真故。

譬如真如。體性堅固。善根迴向。亦復如是。體性堅固。非諸惑惱之所能沮。譬如真如。不可破壞。善根迴向。亦復如是。一切衆生不能損壞。

〔疏〕十五惑不能壞。十六人不能壞。

譬如真如。照明爲體。善根迴向。亦復如是。以普照明而爲其性。

〔疏〕十七寂而常照。智卽如用故。

譬如真如。無所不在。善根迴向。亦復如是。於一切處。悉無不在。譬如真如。徧一切時。善根迴向。亦復如是。

徧一切時。譬如真如。性常清淨。善根迴向。亦復如是。  
住於世間。而體清淨。譬如真如。於法無礙。善根迴向。  
亦復如是。周行一切。而無所礙。譬如真如。爲衆法眼。  
善根迴向。亦復如是。能爲一切衆生作眼。

〔疏〕二十二。旣以照明爲體。何無照矚之眼。又由見  
如。成法眼故。大般若云。二世諸佛。皆以性空而爲  
佛眼。鈔大般若者。見性爲佛眼故。

譬如真如。性無勞倦。善根迴向。亦復如是。修行一切  
菩薩諸行。恒無勞倦。譬如真如。體性甚深。善根迴向。  
亦復如是。其性甚深。譬如真如。無有一物。善根迴向。

亦復如是。了知其性無有一物。譬如真如。性非出現。善根迴向。亦復如是。其體微妙難可得見。譬如真如。離衆垢翳。善根迴向。亦復如是。慧眼清淨。離諸癡翳。譬如真如。性無與等。善根迴向。亦復如是。成就一切諸菩薩行。最上無等。譬如真如。體性寂靜。善根迴向。亦復如是。善能隨順寂靜之法。譬如真如。無有根本。善根迴向。亦復如是。能入一切無根本法。

〔疏〕三十二云。無根本者。前無所依故。卽無任本故。

譬如真如。體性無邊。善根迴向。亦復如是。淨諸衆生。其數無邊。譬如真如。體性無著。善根迴向。亦復如是。

畢竟遠離一切諸著。譬如真如。無有障礙。善根迴向。亦復如是。除滅一切世間障礙。譬如真如。非世所行。善根迴向。亦復如是。非諸世間之所能行。譬如真如。體性無住。善根迴向。亦復如是。一切生死皆非所住。譬如真如。性無所作。善根迴向。亦復如是。一切所作悉皆捨離。譬如真如。體性安住。善根迴向。亦復如是。安住真實。

**疏**二十七云。安住者。由無所任。安住真實故。

譬如真如。與一切法而共相應。善根迴向。亦復如是。與諸菩薩聽聞修習而共相應。譬如真如。一切法中。

性常平等。善根迴向。亦復如是。於諸世間修平等行。譬如真如。不離諸法。善根迴向。亦復如是。盡未來際。不捨世間。譬如真如。一切法中。畢竟無盡。善根迴向。亦復如是。於諸衆生迴向無盡。

〔疏〕四十一。畢竟無盡者。雖在諸法。諸法盡而體常。又正在法中。取不可盡。如芥子之空故。

譬如真如。與一切法無有相違。善根迴向。亦復如是。不違三世一切佛法。譬如真如。普攝諸法。善根迴向。亦復如是。盡攝一切衆生善根。譬如真如。與一切法同其體性。善根迴向。亦復如是。與三世佛同一體性。

譬如真如。與一切法不相捨離。善根迴向。亦復如是。攝持一切世出世法。譬如真如。無能映蔽。善根迴向。亦復如是。一切世間無能映蔽。譬如真如。不可動搖。善根迴向。亦復如是。一切魔業無能動搖。譬如真如。性無垢濁。善根迴向。亦復如是。修菩薩行。無有垢濁。譬如真如。無有變易。善根迴向。亦復如是。愍念衆生。心無變易。譬如真如。不可窮盡。善根迴向。亦復如是。非諸世法所能窮盡。譬如真如。性常覺悟。善根迴向。亦復如是。普能覺悟一切諸法。

〔疏〕五十一性常覺悟者。能內熏發。起厭求故。

譬如真如。不可失壞。善根迴向。亦復如是。於諸衆生起勝志願。永不失壞。

〔疏〕五十二。不可失壞者。在於生處。染而不染。故

譬如真如。能大照明。善根迴向。亦復如是。以大智光照諸世間。

〔疏〕五十三。卽大智光明徧照法界義故。

譬如真如。不可言說。善根迴向。亦復如是。一切言語所不可說。

〔疏〕五十四。離言真如。

譬如真如。持諸世間。善根迴向。亦復如是。能持一切

菩薩諸行譬如真如。隨世言說。善根迴向。亦復如是。隨順一切智慧言說。譬如真如。徧一切法。善根迴向。亦復如是。徧於十方一切佛刹。現大神通。成等正覺。譬如真如。無有分別。善根迴向。亦復如是。於諸世間。無所分別。譬如真如。徧一切身。善根迴向。亦復如是。徧十方刹。無量身中。譬如真如。體性無生。善根迴向。亦復如是。方便示生。而無所生。譬如真如。無所不在。善根迴向。亦復如是。十方三世諸佛土中。普現神通。而無不在。

〔疏〕六十一。無所不在者。上徧一切。卽無邊際。今隨



一一法皆全在中

譬如真如。徧在於夜。善根迴向。亦復如是。於一切夜。放大光明。施作佛事。

〔疏〕六十二。在晝夜。乃至盡未來者。一念長劫。各各收如。各各依如。故得念劫互收互入。

譬如真如。徧在於晝。善根迴向。亦復如是。悉令一切。在晝衆生。見佛神變。演不退輪。離垢清淨。無空過者。譬如真如。徧在半月。及以一月。善根迴向。亦復如是。於諸世間。次第時節。得善方便。於一念中。知一切時。譬如真如。徧在年歲。善根迴向。亦復如是。住無量劫。

明了成熟。一切諸根皆令圓滿。譬如真如。徧成壞劫。善根迴向。亦復如是。住一切切清淨無染。教化衆生。咸令清淨。譬如真如。盡未來際。善根迴向。亦復如是。盡未來際。修諸菩薩清淨妙行。成滿大願。無有退轉。譬如真如。徧住三世。善根迴向。亦復如是。令諸衆生。於一刹那。見三世佛。未曾一念而有捨離。譬如真如。徧一切處。善根迴向。亦復如是。超出三界。周徧一切。悉得自在。譬如真如。住有無法。善根迴向。亦復如是。了達一切有無之法。畢竟清淨。

疏七十任有無者。理無惑計。有無常實故。鈔理無惑計者。

卽生公十四科實相義中。具云。夫感情所封。則兩  
端斯失。失理背宗。所計皆虛。理無惑計。則有無並  
實。實則說空。可以祛滯。有者之惑。明有可以釋守  
空者之迷。斯則空有二教。旨俱得實。釋曰。此中有  
三。初約清非。二約理是。三約  
教真。今當其中。但用理是。

譬如真如體性清淨。善根迴向亦復如是。能以方便  
集助道法。淨治一切諸菩薩行。譬如真如體性明潔。  
善根迴向亦復如是。令諸菩薩悉得三昧明潔之心。

〔疏〕七十二。性覺爲明。離念爲潔。

譬如真如體性無垢。善根迴向亦復如是。遠離諸垢  
滿足一切諸清淨意。譬如真如無我我所。善根迴向  
亦復如是。以無我我所清淨之心。充滿十方諸佛國。

土譬如真如。體性平等。善根迴向亦復如是。獲得平等。一切智智。照了諸法。離諸癡翳。譬如真如。超諸數量。善根迴向亦復如是。與超數量一切智乘大力法藏。而向止住。興徧十方一切世界。廣大法雲。譬如真如。平等安住。善根迴向亦復如是。發生一切諸菩薩行。平等住於一切智道。譬如真如。徧住一切諸衆生界。善根迴向亦復如是。滿足無礙一切種智。於衆生界悉現在前。譬如真如。無有分別。普住一切音聲智中。善根迴向亦復如是。具足一切諸言音智。能普示現種種言音。開示衆生。譬如真如。永離世間。善根迴

向亦復如是。普使衆生永出世間。譬如真如體性廣大。善根迴向亦復如是。悉能受持去來今世廣大佛法。恒不怠失。勤修一切菩薩諸行。譬如真如無有間息。善根迴向亦復如是。爲欲安處一切衆生於大智地。於一切劫修菩薩行。無有間息。譬如真如體性寬廣。徧一切法。善根迴向亦復如是。淨念無礙。普攝一切寬廣法門。譬如真如徧攝羣品。善根迴向亦復如是。證得無量品類之智。修諸菩薩真實妙行。譬如真如無所取著。善根迴向亦復如是。於一切法皆無所取。除滅一切世間取著。普令清淨。譬如真如體性不

動善根迴向亦復如是。安住普賢圓滿行願畢竟不  
動。譬如真如是佛境界。善根迴向亦復如是。令諸衆  
生滿足一切大智境界。滅煩惱境。悉令清淨。譬如真  
如無能制伏。善根迴向亦復如是。不爲一切衆魔事  
業外道邪論之所制伏。譬如真如非是可修。非不可  
修。善根迴向亦復如是。捨離一切妄想取著。於修不  
修無所分別。

〔疏〕八十九非可修者。無所得故。非不可修者。爲聖  
境故。

譬如真如。無有退捨。善根迴向亦復如是。常見諸佛。

發菩提心。大誓莊嚴。永無退捨。譬如真如。普攝一切  
世間言音。善根迴向。亦復如是。能得一切差別言音  
神通智慧。普發一切種種言詞。譬如真如。於一切法  
無所希求。善根迴向。亦復如是。令諸衆生乘普賢乘  
而得出離。於一切法無所貪求。譬如真如。住一切地。  
善根迴向。亦復如是。令一切衆生捨世間地。住智慧  
地。以普賢行。而自莊嚴。譬如真如。無有斷絕。善根迴  
向。亦復如是。於一切法得無所畏。隨其類音。處處演  
說。無有斷絕。譬如真如。捨離諸漏。善根迴向。亦復如  
是。令一切衆生成就法智。了達於法圓滿。菩提無漏。

功德

〔疏〕九十五。捨離諸漏者。準梵本云。阿那薩攞嘑。此云無漏。今言捨者。性本捨故。猶心體離念。

譬如真如。無有少法而能壞亂。令其少分非是覺悟。善根迴向。亦復如是。普令開悟一切諸法。其心無量徧周法界。

〔疏〕九十六云。無有少法而能壞亂。令其少分非覺悟者。如徧非情。則有少分非是覺悟。况經云。佛性除於瓦石。論云。在非情數中。名爲法性。在有情數中。名爲佛性。明知非情非有覺性。故應釋言。以性



從緣則情非情異。爲性亦殊。如涅槃等。以緣從性。則非覺不覺。本絕百非。言亡四句。若二性互融。則無非覺悟。起信云。以色性卽智性故。說名智身。以智性卽色性故。說名法身。徧一切處。論云。菩提菩提斷。俱名爲菩提。說智及智處。俱名爲般若。亦可證此。旣二性相卽。緣復卽性。故無少分非覺悟者。况心爲總相。又融攝重重哉。鈔無有少下。文中三意。初牒經二。如徧非情下。設難三。故應釋云下。會通。然此段疏。爲遮妄執一切無情有佛性義。就計此義。自有淺深。一謂精神化爲土木金石。梟獍負塊。以成於子。情變非情。非情變情。斯爲邪見。不異外道衆生。計生草木有命。故不可也。若說無情同一性故。則稍近宗。亦須得意。彼本立意。約於眞如。自體徧故。眞實之性。

無有二故。涅槃經說。第一義空為佛性故。一切法  
 中有安樂性。攝境從心。無非心故。色性智性體無  
 二故。如是等文。諸經具有。今謂此釋。太即太過。失  
 情無情。壞於性相。若以涅槃第一義空。該通心境。  
 涅槃。何以棟於瓦礫。言無性耶。廣如別破。今直顯  
 正義。謂性與相。非一非異。情與非情。亦非一非異。  
 故應釋言。以性從緣等。一如涅槃者。棟去墻壁瓦  
 礫等故。二無覺不覺者。真性之中。無心境故。三無  
 非覺悟。以無情性。融覺性故。引起信文。畧一句。  
 然其此義。前已引竟。今此復要。彼論通問。問云。若  
 諸佛法身。離於色相者。云何能現種種色相。答。即  
 此法身。是色體故。能現於色。所謂從本已來。色心  
 不二。以色性。即智性故。色體無形。說名智身。以智  
 性。即色性故。說名法身。編一切處。今取二性相。即  
 互融之義。說耳。論云。等者。引證。非正證。前故云。亦  
 可證此。可為證者。智及智處。同般若故。既二性下。  
 結釋經文。况心為總相。下舉况以釋。前結一性義。  
 今結唯心義。總相則無所不攝。又融攝重重。即本  
 經意。隨舉一塵。即含法界。何令色境非一性耶。

譬如真如。過去非始。未來非末。現在非異。善根迴向。亦復如是。爲一切衆生新新恒起菩提心願。普使清淨永離生死。

〔疏〕九十七云。過去非始等者。過去初際。所以名始。未來爲終。故稱爲末。現在似有。已未分之無躋在時。故名爲異。今明真如雖徧三世之中。體絕三世初中後相。故竝言非。迴向亦爾。雖爲衆生新新起願。同彼真如徧三世中。而令永離三世生灰之相。方名清淨。

譬如真如。於三世中無所分別。善根迴向亦復如是。

現在念念心常覺悟。過去未來皆悉清淨。

〔疏〕九十八言三世無分別者。前約遮詮。不同三世。今約顯詮。常無分別。意旨相似。故晉本合之耳。又上不同三世。總顯非新。今無分別。亦明非故。而性相互融。能新能故。新故雙絕矣。

譬如真如。成就一切諸佛菩薩善根。迴向亦復如是。發起一切大願。方便成就諸佛廣大智慧。譬如真如。究竟清淨。不與一切諸煩惱俱。善根迴向亦復如是。能滅一切衆生煩惱。圓滿一切清淨智慧。

○第三迴向成益及結名

佛子。菩薩摩訶薩如是迴向時。得一切佛刹平等。普  
嚴淨一切世界故。得一切衆生平等。普爲轉無礙法  
輪故。得一切菩薩平等。普出生一切智願故。得一切  
諸佛平等。觀察諸佛體無二故。得一切法平等。普知  
諸法性無易故。得一切世間平等。以方便智善解一  
切語言道故。得一切菩薩行平等。隨種種善根盡迴  
向故。得一切時平等。勤修佛事。於一切時無斷絕故。  
得一切業果平等。於世出世所有善根皆無染著。咸  
究竟故。得一切佛自在神通平等。隨順世間現佛事  
故。佛子。是爲菩薩摩訶薩第八真如相迴向。

疏並顯可知。

論以如上迴向。皆以無性無著真如爲迴向分。明以真如爲迴向體。以真如徧世間出世間一切法。迴向還徧世間出世間一切法。何以然者。爲以迴向爲方便。興起無作真如中大智大悲大陀羅尼門大神通道力。令稱真如無作大自在作用恆寂故。若不如是。以大願大悲大智慧無限迴向。但依無作真如。用淨煩惱。卽同二乘樂寂。及三乘六通菩薩。但生一方淨國。不入法界之真門。居門外之權乘。且止草菴之位。當知滿十方之差別種智。皆

由大願力而發生。圓法界之行門。藉迴向而興起。故立斯教網。用接有緣。明知軌度而踐其蹤。使學者省功而不錯謬者也。

○大文第二明位果

菩薩摩訶薩住此迴向。證得無量清淨法門。能爲如來大師子吼自在無畏。以善方便。教化成就無量菩薩。於一切時未曾休息。得佛無量圓滿之身。一身充徧一切世界。得佛無量圓滿音聲。一音開悟一切衆生。得佛無量圓滿之力。一毛孔中普能容納一切國土。得佛無量圓滿神通。置諸衆生於一塵中。得佛無

量圓滿解脫於一衆生身示現一切諸佛境界成等  
正覺得佛無量圓滿三昧。三昧中普能示現一切  
三昧得佛無量圓滿辯才。說一句法窮未來際而不  
可盡。悉除一切衆生疑惑得佛無量圓滿衆生具佛  
十力。盡衆生界示成正覺佛子。是爲菩薩摩訶薩以  
一切善根順真如相迴向。

〔疏〕初牒得因。後證得下。正顯所得。文有十句。初總  
餘別。皆云無量者。同如廣大無盡故。皆云得佛者。  
同佛所證故。作佛事故。大文第二佛子下。總以結  
示。



○第二應頌

爾時金剛幢菩薩承佛威力。普觀十方而說頌言

〔疏〕二十九偈分四

菩薩志樂常安住 正念堅固離癡惑

其心善軟恒清涼 積集無邊功德行

菩薩謙順無違逆 所有志願悉清淨

已得智慧大光明 善能照了一切業

〔疏〕初六頌隨相於中先二所迴行體

菩薩思惟業廣大 種種差別甚希有

決意修行無退轉 以此饒益諸羣生

諸業差別無量種

菩薩一切勤修習

隨順衆生不違意

普令心淨生歡喜

已升調御人尊地

離諸熱惱心無礙

於法於義悉善知

爲利羣生轉勤習

菩薩所修衆善行

無量無數種種別

於彼一切分別知

爲利羣生故迴向

〔疏〕後四迴向之行。

以妙智慧恒觀察

究竟廣大真實理

斷諸有處悉無餘

如彼真如善迴向

譬如真如徧一切

如是普攝諸世間

|         |         |
|---------|---------|
| 菩薩以此心迴向 | 悉令衆生無所著 |
| 菩薩願力徧一切 | 譬如真如無不在 |
| 若見不見念悉周 | 悉以功德而迴向 |
| 夜中隨住晝亦住 | 半月一月亦隨住 |
| 若年若劫悉住中 | 真如如是行亦然 |
| 所有三世及刹土 | 一切衆生與諸法 |
| 悉住其中無所住 | 以如是行而迴向 |
| 譬如真如本自性 | 菩薩如是發大心 |
| 真如所在無不在 | 以如是行而迴向 |
| 譬如真如本自性 | 其中未曾有一法 |

不得自性是眞性

以如是業而迴向

如眞如相業亦爾

如眞如性業亦爾

如眞如性本眞實

業亦如是同眞如

譬如眞如無邊際

業亦如是無有邊

而於其中無縛著

是故此業得清淨

辨  
〔疏〕二有十六偈。頌離相迴向。於中先九頌對如廣

如是聰慧眞佛子

志願堅固不動搖

以其智力善通達

入於諸佛方便藏

覺悟法王眞實法

於中無著亦無縛

|         |         |
|---------|---------|
| 如是自在心無礙 | 未曾見有一法起 |
| 如來法身所作業 | 一切世間如彼相 |
| 說諸法相皆無相 | 知如是相是知法 |
| 菩薩住是不思議 | 於中思議不可盡 |
| 入此不可思議處 | 思與非思皆寂滅 |
| 如是思惟諸法性 | 了達一切業差別 |
| 所有我執皆除滅 | 住於功德無能動 |
| 菩薩一切業果報 | 悉爲無盡智所印 |
| 如是無盡自性盡 | 是故無盡方便滅 |
| 菩薩觀心不在外 | 亦復不得在於內 |

知其心性無所有

我法皆離永寂滅

〔疏〕後七卻頌約法。直明菩薩住是不思議等。宜善思之。

彼諸佛子如是知

一切法性常空寂

無有一法能造作

同於諸佛悟無我

了知一切諸世間

悉與真如性相等

見是不可思議相

是則能知無相法

若能住是甚深法

常樂修行菩薩行

爲欲利益諸羣生

大誓莊嚴無退轉

是則超過於世間

不起生死妄分別

了達其心如幻化

勤修衆行度羣生

菩薩正念觀世間

一切皆從業緣得

爲欲救度修諸行

普攝三界無遺者

了知衆生種種異

悉是想行所分別

於此觀察悉明了

而不壞於諸法性

〔疏〕三六偈。頌迴向成益。

智者了知諸佛法

以如是行而迴向

哀愍一切諸衆生

令於實法正思惟

〔疏〕四一偈。結迴向意。竝可知。

〔論〕有五十八行頌。明以頌重頌。前法分。經文自具。

經云。得佛無量圓滿之身。一身充徧一切世間。得佛無量圓滿之力。一毛孔中。普能容納一切國土。得佛無量神通。置諸衆生於一毛孔。此約十住初心見道之後。能入如實知見。然爲凡夫有信之士。畧釋少分。以開心目。須入禪定。觀智會融。方親見爾。論主以頌說曰。了知毛孔大小性。十方國土無表裏。智境含容十方刹。刹土體相本皆幻。智身體淨相無礙。毛孔微塵亦復然。國土因心虛妄生。無妄智境恆相納。衆生心淨無表裏。乃了自身毛亦然。心無分別自他情。一切塵毛含佛刹。是故如來



說迴向。廣興願。行融自他。願他得樂。與已同心。淨佛國。恆相入。以廣大願。興大智。同體智。悲充法界。無功理智。起身雲。隨類現形。聲亦爾。能以自他同體智。衆生身中現佛國。以衆生智轉法輪。衆生心迷。不知覺。以衆生智是佛智。佛智本是衆生智。迷者佛智作衆生。悟者衆生是佛智。如是了達體同別。堪與衆生作依止。

約釋第八真如相迴向竟

大方廣佛華嚴經疏論纂要卷第五十六

福城比丘尼傳慧傳禪海登海願海涵  
寂振寂慎寂貞寂麗與海明今寂馨信  
士林日炫黃殿使吳荆使信女林一善  
馬王使寂焱林傳璋陳寂覲同刻  
華嚴經十廻向品疏論纂要第五十六  
卷伏願植晉賢法界之種入彌勒樓閣  
之門人天之福報昌隆菩提之果德圓  
滿  
康熙二十二年九月 日華藏室謹題